

एजा

कुसू बन्दियन क वापसी में मदद करत ह

1 फारस क राज कुसू क सासन क पहिले बरिस यहोवा कुसू क आतिमा क एक तु घोसणा करइ क बरे उत्साहित किहस। कुसू उ घोसणा क लिखवाएस अउ अपने राज में हर एक जगह बँचवाएस। इ एह बरे कीन्ह गवा रहा ताकि यहोवा क उ सँदेसा जउन यिर्मयाह क जेरिये कहा गवा रहा, पूरा होइ सकइ। घोसणा इ अहइ:

2“फारस क राजा कुसू क सँदेसा:

सरग क परमेस्सर यहोवा, पृथ्वी क सारे राज मोक दिहेस ह अउर यहोवा मोक यहूदा देस क यरूसलेम में ओकर एक तु मन्दिर बनावइ बरे चुनेस। अयहोवा, इस्राएल क परमेस्सर अहइ, उ परमेस्सर जउन यरूसलेम में अहइ। जदि परमेस्सर क कउनो लोग तोहरे बीच रहत अहइ तउ मई इ पराथना करत हउँ कि परमेस्सर ओका आसीर्बाद देइ। उ पचे क यहूदा देस क यरूसलेम में जाइ चाही। उ पचे यहोवा क मन्दिर क बनावइ बरे जाइ चाही, 4अउर एह बरे कउनो भी उ जगह में जहाँ इस्राएल क लोग बचे होई। उ जगहिया क लोगन क ओन बचे हुवन क मदद करइ चाही। ओन लोगन क चाँदी, सोना, गाइ अउर दूसर चिजियन द्या। यरूसलेम में परमेस्सर क मन्दिर बरे ओका भेंट द्या।”

5एह बरे यहूदा अउर बिन्यामीन क परिवार समूहन क प्रमुखन यरूसलेम जाइ क तइयारी किहन। उ पचे यहोवा क मन्दिर क बनवाइ बरे यरूसलेम जात रहेन। परमेस्सर जउन लोगन क प्रोत्साहित किहे रहा उ पचे भी यरूसलेम जाइ क तइयार होइ गएन। 6ओनकर सबहि पड़ोसियन ओका चाँदी अउर सोना क चिजियन औजार, जनावरन अउर कीमती चिजियन क ओन दुसर चिजियन क अतिरिक्त जउन उ पचे मेल भेंट क रूप में दिहन, दइ क ओनका मदद किहन। 7राजा कुसू भी ओन चिजियन क लिआवा जउन यहोवा क मन्दिर क रहिन। नबूकदनेस्सर ओन चिजियन क यरूसलेम स लूट लिआवा रहा। नबूकदनेस्सर ओन चिजियन क अपने उ मन्दिर में धरेस, जेहमाँ उ अपने लबार देवतन क धरत रहा। 8फारस क राजा कुसू अपने उ मनई स ओकरे धने क देखरेख करत रहा, एन चिजियन क बाहेर लिआवइ बरे कहेस। उ मनई क नाउँ मिथूदात रहा। एह बरे मिथूदात ओन चिजियन क यहूदा क प्रमुख सेसबस्सर क लगे लइके आवा।

9जिन चिजियन क मिथूदात यहोवा क मन्दिर स लिआवा रहा, उ सबइ इ सबइ रहिन:

सोना क भाँड़ी	30
चाँदी क भाँड़ी	1,000
चाकू अउर कड़ाहियन	29
10सोना क खोसन	30
सोना क खोसन जइसे चाँदी क खोसन	410
अउ एक हजार दूसर तरह क भाँड़ी	1,000

11सब मिलाइके हुवँ सोना चाँदी क बनी पाँच हजार चार सौ चिजियन रहिन। सेसबस्सर एन सबहि चिजियन क अपने संग उ समइ लिआवा जब बन्दियन बाबेल छोड़न अउर यरूसलेम क वापस लउट गएन।

छुटके वापस आवइ वाले बन्दियन क सूची

2 इ सबइ राज क उ सबइ मनई अहई जउन बंधुवाई स लउटके आएन। बाबेल क राजा नबूकदनेस्सर ओन लोगन क बन्दी क रूप में बाबेल लिआवा रहा। इ सबइ लोग यरूसलेम अउ यहूदा क वापस आएन। हर एक मनई यहूदा में अपने-अपने नगर क वापस गवा। 2इ सबइ उ सब लोग अहई जउन जरूबबाबेल क संग वापस आएन: येसू, नहेम्याह, सरायह, रेलायह, मोर्दकै, बिलसान, मिस्पार, बिगवै, रहूम अउर बाना। इ इस्राएल क ओन लोगन क नाउँ अउर ओनकर गनती अहइ जउन वापस लउटेन:

3परोस क संतान	2,172
4सपत्याह क संतान	372
5आरह क संतान	775
6येसू अउर योआब क परिवार क पहलमोआब क संतान	2,812
7एलाम क संतान	1,254
8जत्तू क संतान	945
9जक्कै क संतान	760
10बानी क संतान	642
11बेबै क संतान	623
12अजगाद क संतान	1,222
13अदोनीकाम क संतान	666
14बिगवै क संतान	2,056
15आदीन क संतान	454
16आतेर क संतान (हिजकिय्याह क परिवारिक पीढ़ी स)	98
17बेसै क संतान	323
18योरा क संतान	112
19हासूम क संतान	223
20गिब्बार क संतान	95
21बेतलेहेम नगर क लोग	123

22	नतोपा क नगर स	56
23	अनातोत नगर स	128
24	अजमावेत क नगर स	42
25	किर्यतारीम, कपीरा अउर बेरोत नगरन स	743
26	रामा अउ गोबा नगर स	621
27	मिकमास नगर स	122
28	बेतेल अउर ऐ नगर स	223
29	नबो नगर स	52
30	मगबीस नगर स	156
31	एलाम नाउँ क दूसर नगर स	1,254
32	हारीम नगर स	320
33	लोद, हादीद अउ ओनो नगरन स	725
34	यरीहो नगर स	345
35	सना नगर स	3,630

36 याजकन क नाउँ अउर ओनकर गनती क सूची इ अहइ:

यदायाह क संतान (येसू क पारिवारिक पढ़ी स)	973
37 इम्मरे क संतान	1,052
38 पसहूर क संतान	1,247
39 हारीम क संतान	1,017

40 लेवीबंसी कहे जाइवाले लेवी क परिवार क गनती इ अहइ:

येसू अउर कदमिएल (होदग्याह क पारिवारिक पढ़ी स)	74
41 गायकन क गनती इ अहइ:	
आसाप क संतान	128
42 मन्दिर क दुआरपालन क गनती इ अहइ:	
सल्लूम, आतेर, तल्मोन, अक्कूब, हतीता अउर सोबै क संतान	139

43 मन्दिर क खास सेवक क इ सबइ सन्तानन अहइ: सीहा क संतानन, हसूपा क संतानन, तब्बओत क संतानन,

44 केरोस क संतानन, सीअहा क संतानन, पादोन क संतानन,

45 लबाना क संतानन, हागाब क संतानन, अक्कूब क संतानन,

46 हागाब क संतानन, सल्मै क संतानन, हानान क संतानन,

47 गिहल क संतानन, गहर क संतानन, रायाह क संतानन,

48 रसीन क संतानन, नकोदा क संतानन, गज्जाम क संतानन,

49 उज्जा क संतानन, पासेह क संतानन, बेसै क संतानन,

50 अस्ना क संतानन, मूनीम क संतानन, नपीसीम क संतानन,

51 बकबूक क संतानन, हक्पा क संतानन, हहूर क संतानन,

52 बसलूत क संतानन, महीदा क संतानन, हर्सा क संतानन,

53 बर्कोस क संतानन, सीसरा क संतानन, तेमह क संतानन,

54 नसीह अउ हतीपा।

55 इ सबइ सुलैमान क सेवकन क संतानन अहइ: सोतै क संतानन, हस्सोपेरेत क संतानन, परूदा क संतानन।

56 याला क संतानन, दर्कोन क संतानन, गिद्देल क संतानन,

57 सपल्याह क संतानन, हतील क संतानन, पोकरेत क संतानन, सबायीम क संतानन,

58 मन्दिर क सेवक अउ सुलैमान क सेवकन क कुल संतान। 392

59 कछू लोग एन नगरन स यरूसलेम आएन: तेलमेलह, तेलहर्सा, करूब, अद्दान अउर इम्मोर। मुला इ सबइ लोग इ प्रमाणित नाहीं कइ सकेन कि ओनकर परिवार इस्त्राएल क परिवार स अहइ। ओनकर नाउँ अउर ओनकर गनती इ अहइ:

60 दलायाह क संतानन, तोबिय्याह क संतानन अउर नकोदा क संतानन 652

61 याजकन क परिवारन क नाउँ इ अहइ:

हबायाह क संतानन, हक्कोस क संतानन अउ बर्जिल्लै क संतानन (एक मनई जउन गिलादी क बर्जिल्लै क बिटिया स बियाह किह रहा अउर बर्जिल्लै क पारिवारिक नाउँ स ही जान जाना रहा।)

62 एन लोग अपने पारिवारिक इतिहासन क खोज किहन, मुला ओका पाइ नाहीं सकेन। ओनकर नाउँ याजकन क सूची में नाहीं सामिल कीन्ह गए रहेन। उ सबइ इ प्रमाणित नाहीं कइ सकेन कि ओनकर पुरखा याजक रहेन। इहइ कारण उ पचे याजक नाहीं होइ सकत रहेन। 63 राज्यापाल एन लोगन क आदेस दिहेस कि इ सबइ लोग कउनो भी पवित्र भोजन न करइँ। उ पचे तब तलक इ पवित्र भोजन नाहीं खाइ सकतेन जब तलक ओन में स कउनो एक ऊरीम अउर तुम्मीम* क उपयोग न कइ ले।

64 सब मिलाइके 42,360 लोग उ समूह में रहेन जे वापस लउट आएन। 65 ओनके अतिरिक्त एहमाँ 7,337 सेवक अउर सेविकन रहेन। ओनके संग 200 गायक अउ गायिकन भी रहिन। 66 ओनके लगे 736 घोड़न, 245 खच्चर, 67 चार स पेंतीस उँट अउ 6,720 गदहन रहेन।

68 उ समूह यरूसलेम में यहोवा क मन्दिर क पहोंचा। तब परिवार क प्रमुखन यहोवा क मन्दिर क बनावइ क बरे

ऊरीम अउर तुम्मीम एक बिसेस तरह क पाथर जेका महा याजक परमेस्सर क इच्छा जानइ बरे प्रयोग करत रहा। लखा, निर्गमन 28:30; गनती 27:21

आपन भेंट दिहेन। उ पचे जउन मन्दिर नस्ट होइ गवा रहा उहइ क जगह पइ नवा मन्दिर बनावइ चाहेन। 69ओन लोग ओतना दिहन जेतना उ पचे दइ सकत रहेन। इ सबइ उ सब चिजियन अहई जेनका उ पचे मन्दिर बनावइ क बरे दिहेन: लगभग 500 किलो सोना, तीन टन चाँदी अउर याजकन क पहिरइ वाले 100 चोगन।

70इ तरह याजक, लेवीवंसी अउर कछू दूसर लोग यरूसलेम अउर ओकरे चारिहुँ कइँती क पहँटा मँ बस गएन। इ समूह मँ मन्दिर क गायक, दुआरपाल अउर मन्दिर क सेवक सामिल रहेन। इस्त्राएल क दूसर लोग अपने निजी निवास जगहन मँ बस गएन।

वेदी क फुन स बनब

3 एह बरे सतवें महीने स इस्त्राएल क लोग अपने अपने नगरन मँ लउट गएन। उ समइ, सबहिँ लोग यरूसलेम मँ एक संग एकट्टे भएन। उ पचे सबहिँ एक इकाई क रूप मँ संगठित रहेन। 2तब योसादाक क पूत येसू अउर ओकरे संग याजकन अउ सालतीएल क पूत जरूब्बाबेल अउ ओकरे संग क लोग इस्त्राएल क परमेस्सर क वेदी बनाएन। ओन लोग इस्त्राएल क परमेस्सर बरे वेदी एह बरे बनाएन ताकि उ पचे एह पइ बलि चढ़ाइ सकइँ। उ पचे ओनका ठीक मूसा क नेमन क अनुसार बनाएन। मूसा परमेस्सर क बिसेस सेवक रहा।

3उ सबइ लोग अपने आस पास क रहइवाले दूसर लोगन स डरे भए रहेन। मुला इ डर ओनका रोक न सका अउर उ पचे वेदी क पुरानी नैव पइ वेदी बनाएन अउर ओह पइ यहोवा क होमबलि दिहन। 4तब उ पचे आस्रयन क ल्यौहार ठीक वइसे ही मनाएन जइसा मूसा क नेम मँ कहा गवा अहइ। उ पचे उत्सव क हर एक दिन क बरे उचित गनती मँ होमबलि दिहन। 5ओकरे पाछे, उ पचे लगातार चलइवाली हर दिन क होमबलि नवा चाँद, अउर सबहिँ दूसर उत्सव व बिस्त्राम क दिनन क भेंटन चढ़ाउब सुरू किहन जइसा कि यहोवा क जरिये आदेस दीन्ह गवा रहा। लोग दूसर ओन भेंटन क भी चढ़ावइ क लागेन जेनका उ पचे यहोवा क चढ़ावइ चाहत रहेन। 6एह बरे सतएँ महीना क पहिले दिन इस्त्राएल क एन लोग यहोवा क फुन भेंट चढ़ाउब सुरू किहन। इ तब भी कीन्ह गवा जब कि मन्दिर क नैव अबहिँ फुन स नाहीं बनी रही।

मन्दिर क फुन निर्माण

7तब ओन लोग जउन बन्धुवाई स छुटिके आए रहेन, संगतरासन अउर बढइयन क धन दिहेन अउर उ पचे सोर अउर सीदोन क लोगन क भोजन, दाखरस अउर जैतून क तेल दिहन। ताकि उ पचे लबानोन क देवदार क बूच्छ लिआवइ सकेन। उ पचे चाहत रहेन कि उ पचे जापा नगर क समुद्री तट पइ लट्ठन क जहाजन क मँ लिआवइँ। फारस क राजा कुस्तू इ करइ बरे ओनका मंजूरी दइ दिहस।

8एह बरे यरूसलेम मँ मन्दिर पइ ओनके पहोंचइ क दूसर बरिस क दूसर महीने मँ सालतीएल क पूत जरूब्बाबेल अउर योसादाक क पूत येसू काम करब सुरू किहस।

ओनकर भाइयन, याजकन, लेवीवंसियन अउ हर एक मनई जउन बन्धुवाई स यरूसलेम लउटे रहेन, सब ओनके संग काम करब सुरू किहन। उ पचे यहोवा क मन्दिर क बनावइ बरे ओन लेवीवंसियन क निरीच्छक चुनेन जउन बीस बरिस या ओहसे जियादा उमिर क रहेन। 9इ सबइ उ सब लोग रहेन जउन मन्दिर क बनइ क देखरेख करत रहेन, येसू क पूत अउर ओकर भाई, कदमीएल अउ ओकर पूत (यहूदा क सन्तान रहेन) हेनादाद क पूत अउ ओनकर बंधु लेवीवंसी। 10कारीगरन यहोवा क मन्दिर क नेव डाउब पूरी कइ दिहन। जब नैव पइ गइ तब याजकन अपने खास ओढ़ना पहिरेन। तब उ पचे आपन तुरुही लिहन अउ आसाप क पूतन अपनी झॉइन क लिहन। उ पचे यहोवा क स्तुति क बरे अपने अपने जगह लइ लिहन। इ उहइ तरह कीन्ह गवा जउने तरह करइ क बरे भूतकाल मँ इस्त्राएल क राजा दाऊद आदेस दिहे रहा। 11यहोवा जउन कछू किहस, उ पचे ओकरे बरे ओकर बड़कई करत भए अउ धन्नवाद देत भए, इ गीत गाएन “उ अच्छा अहइ, ओकर इस्त्राएल क बरे पिरेम सास्वत अहइ।” अउर तब सबहिँ लोग खुस भएन। उ पचे बहोत जोर स उद्घोस अउ यहोवा क स्तुति किहन। काहे? काहेकि मन्दिर क नैव पूरी होइ चुकी रही।

12मुला बुजुर्ग याजकन मँ स बहोत स, लेवीवंसी अउर परिवार प्रमुख रोइ पड़ेन। काहे? काहेकि ओन लोग पहिले मन्दिर क लखे रहेन, अउर उ पचे इ याद करत रहेन कि उ केतना सुन्नर रहा। उ सबइ रोइ पड़ेन जब उ पचे नवे मन्दिर क लखेन। उ पचे रोवत रहेन जब बहोत स दूसर लोग खुस रहेन अउर सोर मचावत रहेन। 13उद्घोस बहोत दूर तलक सुना जाइ सकत रहा। ओन सबहिँ लोग एँतना सोर मचाएन कि कउनो मनई खुसी क उद्घोस अउ रोवइ मँ अन्तर नाहीं कइ सकत रहा।

मन्दिर क पुनः निर्माण क बिरुद्ध दुस्मन

4 1-2उ पहँटा मँ रहइवाले बहोत स लोग यहूदा अउ बिन्यामीन क लोगन क बिरुद्ध रहेन। ओन दुस्मनन सुनेन कि सबइ लोग जउन बन्धुवाई स आएन ह उ सबइ, इस्त्राएल क परमेस्सर यहोवा क बरे एक ठु मन्दिर बनावत अहई। एह बरे उ सबइ दुस्मन जरूब्बाबेल अउ परिवार प्रमुखन क लगे आएन अउ उ पचे कहेन, “मन्दिर बनावइ मँ हम क तू पचन क मदद करइ द्या। हम लग उहइ अही जउन तू अहा, हम तोहरे पचन्क परमेस्सर स मदद माँगित ह। हम लोग तोहरे पचन्क परमेस्सर क तब स बलि चढ़ावा ह जब स अस्सूर क राजा एसहर्ददोन हम लोगन क हिआँ लिआव।”

3मुला जरूब्बाबेल, येसू अउर इस्त्राएल क दूसर परिवार प्रमुखन जवाब दिहन, “नाहीं, तू जइसे लोग हमरे परमेस्सर क बरे मन्दिर बनावइ मँ हम क मदद नाहीं कइ सकतेन। सिरिफ हम लोग ही यहोवा क बरे मन्दिर बनाइ सकित ह। उ इस्त्राएल क परमेस्सर अहइ। फारस क राजा कुस्तू जउन करइ क आदेस दिहस ह, उ इहइ अहइ।”

4यह बरे उ देस क लोग मन्दिर क बनावइ क कार्य रोकइ क बरे जतन करत भए यहूदी लोगन क हिम्मत तोड़इ क बरे ओनका डराउब सुरु किहन। 5ओन दुस्मनन सलाहकारन क यहूदा क लोगन क खिलाफ काम करइ क बरे बेसहि लिहन। उ सलाहकारन ओनके जोजनन में बाधा डवइ क जतन किहेन। इ कारज तब तलक लगातार चलत रहा जब तलक कुस्रू फारस क राजा रहा अउर बाद में जब तलक दारा फारस क राजा नाहीं होइ गवा।

6ओन दुस्मनन यहूदियन क रोकइ क बरे जतन करत भए फारस क राजा क पत्र भी लिखेन। अउर उ पचे इ पत्र फारस क राजा छयर्स क सासन काल क सुरु में लिखेन।

यरूसलेम क पुनः निर्माण क बिरुद्ध दुस्मन

7पाछे, जब अर्तछत्र फारस क नवा राजा भवा, एन लोगन में स कछू यहूदियन क खिलाफ सिकाइत करत भए एक ठू अउर पत्र लिखेन। जउन लोग उ पत्र लिखेन, उ सबइ इ सब रहेन: बिसलाम, मिथदात, ताबेल अउर ओकरे दल क दूसर लोग। उ पचे पत्र राजा अर्तछत्र क अरामी में अरामी लिपि क उपयोग करत भए लिखेन।

8तब सासन अधिकारी रहूम अउर लिपिक सिमसै यरूसलेम क लोगन क खिलाफ पत्र लिखेन। उ पचे राजा अर्तछत्र क पत्र लिखेन। उ पचे जउन लिखेन उ इ रहा:

9सासन अधिकारी रहूम, लिपिक सिमसै, निआधीसन अउर तर्पली, फारसी, एरेकी, बाबेली लोगन पइ क महत्त्वपूर्ण उच्चय अधिकारियन अउर सूसनी क एलामी लोगन क कईती स, 10अउ उ सबइ दूसर लोग क ओर स जेनका महान अउर सक्तीसाली ओस्नप्पर सोमरोन क नगरन अउर परात नदी क पच्छिमी पहँटा क दूसर जगहन पइ बसाए रहेन।

11इ उ पत्र क प्रतिलिपि अहइ जेका ओन लोग अर्तछत्र क पठाए रहेन।

राजा अर्तछत्र क, परात नदी क पच्छिमी पहँटा में आप क सेवकन कईती स अहइ।

12राजा अर्तछत्र हम आप क सूचित करइ चाहित ह कि जउन यहूदियन क आप-अपने लगे स पठया ह, उ पचे हिआँ आइ गएन ह। उ सबइ यहूदी उ नगर क फुन स बनावइ चाहत हीं। यरूसलेम एक बुरा अउर बिद्रोही नगर अहइ। अब उ पचे यहूदी परकोटन क जेवन क पक्का करत बाटेन अउर देवानन खड़ी करत अहईं।

13राजा अर्तछत्र आप क इ जान लेइ चाही कि यदि यरूसलेम अउर एकर परकोटन फुन बन गएन तउ यरूसलेम क लोगन कर देब बन्द कइ देइहीं। उ पचे आप क सम्मान करइ बरे धन पठउब बन्द कइ देइहीं। उ पचे सेवा कर भी रोक देइहीं अउर राजा क उ सारे धन स हाथ धोवइ पड़ी।

14राजा क एकर जानकारी होइ चाही कि हम लोग राजा क वफ़ादार होइ क वादा किहे रहेन। ऐह बरे

जिम्मेदारी हम लोगन पइ अहइ। हम लोगन क इ सबइ घटित होब नाहीं लखइ चाहतेउँ कि राजा क अपमान होइ। इहइ कारण अहइ कि हम लोग इ पत्र क जरिये राजा क इ बात क सम्बंध में सूचना दिहे अहउँ।

15राजा अर्तछत्र हम इ चाहित ह कि आप ओन राजा लोगन क लेखन क पता लगावईं कि जउन आपक पहिले हुकूमत किहन। आप ओन लेखन में लिखिहीं कि यरूसलेम में सदा ही दूसर राजा लोगन क बरे बिद्रोह किहन। इ दूसर राजा लोगन अउ रास्ट्रन क बरे बहोत कठिनाइयन पइदा किहन ह। पुराने समइ स ही इ नगर बिद्रोह क उभारत अहइ ह। इहइ कारण अहइ कि यरूसलेम नस्ट भवा। 16राजा अर्तछत्र हम आप क सूचित करइ चाहित ह कि यदि इ नगर अउ एकर परकोटन फुन स बन गवा तउ फरात नदी क इ कईती क छेत्र आप क हाथे स निकरि जइहीं।

17तब अर्तछत्र इ जवाब पठाएस:

सासन अधिकारी रहूम अउ लिपिक सिमसै अउ ओनकर सबहिं साथियन क जउन सोमरोन अउ परात नदी क दूसर पच्छिमी प्रदेश में रहत हीं क सुभ-कामनाएँ,

18तू लोग जउन हमरे लगे पत्र पठया ओकर अनुवाद भवा अउर मोका सुनावा गवा। 19मई आदेस दिहेउँ कि मोरे पहिले क राजा लोगन क लेखन क खोज कीन्ह जाइ। लेख बाँचे गएन अउर हम लोगन क ग्यात भवा कि यरूसलेम क जरिये राजा लोगन क खिलाफ बिद्रोह करइ क एक लम्बा इतिहास अहइ। यरूसलेम अइसी जगह रहा नगर जहाँ अक्सर बिद्रोह अउ गद्दारी होत रहत हीं। 20यरूसलेम अउ फरात नदी क पच्छिम क पूरे पहँटा पइ सक्तीसाली राजा राज करत रहेन ह। राज कर अउ राजा क सम्मान बरे धन अउ बिबिध प्रकार क कर ओन राज लोगन क दीन्ह गएन ह।

21अब तू पक्क ओन लोगन क काम बन्द करइ क बरे एक ठु आदेस देइ चाही। इ आदेस यरूसलेम क पुनः निर्माण क रोकइ क बरे तब तलक अहइ, जब तलक कि मई वइसा करइ क आग्या न देउँ। 22सावधान रहया अउर इ आग्या क पालन करइ स इनकार जिन करा यरूसलेम क पुनःनिर्माण चलत नाहीं रहइ चाही, वरना मई यरूसलेम स मिलइवाला आमदनी क खोइ देबउँ।

23तउ उ पत्र क प्रतिलिपि, जेका राजा अर्तछत्र पठाएस रहूम, लिपिक सिमसै अउ ओकरे संग क लोगन क बाँचिके सुनाई गइ। तब उ सबइ लोग बड़ी तेजी स यरूसलेम में यहूदियन क लगे गएन। उ पचे यहूदियन क निर्माण कार्य बन्द करइ क मजबूर किहन।

मन्दिर क कार्य रुका

24इ तरह यरूसलेम में परमेस्सर क मन्दिर क काम रुक गवा। फारस क राजा दारा क सासनकाल क दूसरे बरिस तलक इ कार्य नाहीं चला।

5 तब हागौ नबी अउ इदो क पूत नबी जकर्याह इस्त्राएल क परमेस्सर क नाउँ पड़ यहूदा अउ यरूसलेम में यहूदियन स नबुवत करब सुरु किहन। 2एह बरे सालतीएल क पूत जरुब्बाबेल अउ योसादाक क पूत येसू फुन यरूसलेम में मन्दिर क निर्माण करब सुरु कइ दिहस। अउर परमेस्सर क नबी ओनके संग रहेन अउ कार्य में मदद करत रहेन। 3उहइ समइ फरात नदी क पच्छिम क पहेँटा क राजपाल तत्नै रहा। तत्नै, सतर्बोजनै अउ ओनके संग क लोग जरुब्बाबेल अउ येसू अउ निर्माण करइवालन क लगे गएन। तत्नै अउ ओकरे संग क लोग जरुब्बाबेल अउ ओकरे साथ क लोगन स पूछेस, “तू पचन्क इ मन्दिर क फुन स बनावइ अउ एका दिवारन क बनावइ क काम पूरा करइ क आदेस कउन दिहस?” 4उ पचे जरुब्बाबेल स इ भी पूछेन, “जउन लोग इ इमारत क बनावइ क काम करत अहइँ ओनकर नाउँ क अहइ?”

5मुला परमेस्सर यहूदा क प्रमुखन पड़ दृस्टि रखत रहा। निर्माण करइ वालन क तब तलक काम नाहीं रोकब पड़ा जब तलक ओनकर विवरण राजा क जरिये न पठइ दीन्ह गवा। उ पचे तब तलक काम करत रहेन जब तलक राजा दारा आपन जवाब वापस नाहीं पठएस।

6फरात क पच्छिम क छेत्रन क सासन अधिकारी तत्नै, सतर्बोजनै अउ ओनके संग क महत्त्वपूर्ण मनइयन राजा दारा क लगे पत्र पठएन। 7इ उ पत्र क प्रतिलिपि अहइ:

राजा दारा का अभिवादन

8राजा दारा, आप क मालूम होइ चाही कि हम लोग यहूदा प्रदेस में गएन। हम लोग महान परमेस्सर क मन्दिर क गए। यहूदा क लोग उ मन्दिर क बड़के पाथरन स बनावत अहइँ। उ पचे देवारन में काठे क बड़की बड़की सहतीसन डावत अहइ। काम बड़ी होसियारी स कीन्ह जात अहइ, अउर यहूदा क लोग बहोत मेहनत करत अहइँ।

9हम लोग ओनके प्रमुखन स कछू सवाल ओनके निर्माण कार्य क बारे में पूछेन हम लोग ओनसे पूछेन, “तू पचन्क इ मन्दिर क फुन स बनावइ अउर एकरी छते क काम पूरा करइ क मंजूरी कउन दिहस ह?”

10हम लोग ओनकर नाउँ भी पूछेन। हम लोग ओन लोगन क प्रमुखन क नाउँ लिखइ चाहेउँ जेहसे आप जान सकइँ कि उ पचे कउन लोग अहइँ।

11उ पचे हमक इ जवाब दिहन:

“हम लोग सरग अउ पृथ्वी क परमेस्सर क सेवक अही। हम लोग उहइ मन्दिर क बनावत अही जेका बहोत बरिस पहिले इस्त्राएल क एक महान राजा बनाएस अउर पूरा किहे रहा। 12मुला हमार पुरखन सरग क परमेस्सर क किरोधित किहन। एह बरे परमेस्सर हमरे पुरखन क बाबेल क राजा नबूकदनेस्सर क दिहस। नबूकदनेस्सर इ मन्दिर क नस्ट किहेस अउर उ लोगन क बन्दी क रूप में बाबेल जाइ क मजबूर किहस। 13मुला बाबेल पड़ कुसू क राजा होइ क पहिले बरिस

में राजा कुसू परमेस्सर क मन्दिर क फुन स बनावइ क बरे बिसेस आदेस दिहस। 14कुसू बाबेल में अपने लबार देवता क मन्दिर स ओन सोने चाँदी क चिजियन क निकारिस जउन भूतकाल में परमेस्सर क मन्दिर स चोरी कइ क लइ जाइ गइ रहिन। नबूकदनेस्सर ओन चिजियन क मन्दिर स लिहेस अउर ओनका बाबेल में लबार देवतन क मन्दिर में लइ आवा। तब राजा कुसू ओन सोने चाँदी क चिजियन क सेसबसार क दइ दिहस, कुसू सेसबस्सर क राज्यपाल मुकरर किहस।

15कुसू तब सेसबस्सर स कहेस रहा, “एन सोना चाँदी क चिजियन क ल्या अउर ओनका यरूसलेम क मन्दिर में वापस रखा। उ जगह पड़ परमेस्सर क मन्दिर क बनावे जहाँ उ पहिले रहा”

16एह बरे सेसबस्सर आवा अउर उ यरूसलेम में परमेस्सर क मन्दिर क नैव क काम पूरा किहस। उ दिना स आजु तलक मन्दिर क निर्माण क कार्य चलत आवत अहइ। मुला इ अबहिं तलक पूरा नाहीं भवा ह।”

17अब जदि राजा चाहत हीं तउ कृपा कइके उ पचे राजा लोगन क लेखन क हेरइँ। इ लखइ बरे हेरइँ कि का कुसू राजा क जरिये यरूसलेम में परमेस्सर क मन्दिर क फुन स बनावइ क दीन्ह गवा आदेस फुरइ अहइ अउर तब, महामहिमा, कृपा कइके आप हम लोगन क पत्र पठवइँ जेहसे हम जान सकी कि आप इ विसय में का करइ क निर्णय लिहन ह।

दारा क आदेस

6 एह बरे राजा दारा अपने पहिले क राजा लोगन क लेखन क जाँच करइ क आदेस दिहस। उ सबइ लेख बाबेल में हुवइँ रखे रहेन जहाँ खजाना धरा गवा रहा, 2अहमता क किले में एक दण्ड में चिपका गोल पत्रक मिला। एकवतन मादे प्रान्त में अहइ। उ दण्ड में लिपटे गोल पत्रक पड़ जउन लिखा रहा, उ इ अहइ:

सरकारी टिप्पणी: 3उ कुसू क राजा होइ क पहिले बरिस में कुसू यरूसलेम में परमेस्सर क मन्दिर क बरे एक ठू आदेस दिहस। आदेस इ रहा:

परमेस्सर क मन्दिर फुन स बनइ द्या। इ बलि भेंट करइ क जगह होइ। एकरी नैव क बनइ द्या। मन्दिर साठ हाथ उँच अउ साठ हाथ चौड़ा होइ चाही। 4एकर परकोटन में बिसाल पाथरन क तीन ठु कतारन अउर बिसाल काठे क सहतीसन क एक ठू कतार होइ चाही। मन्दिर क बनावइ क खर्च राजा क खजाने स कीन्ह जाइ चाही। 5साथ ही साथ, परमेस्सर क मन्दिर क सोना अउ चाँदी क चिजियन ओकरे जगह पड़ वापस रखी जाइ चाही। नबूकदनेस्सर ओन चिजियन क यरूसलेम क मन्दिर स लिहे रहा अउर ओनका बाबेल लिआए रहा। उ सबइ परमेस्सर क मन्दिर में वापस रख दीन्ह जाइ चाही।

6एह बरे अब, मई दारा, फरात नदी क पच्छिम क पहुँचन क सासन अधिकारी तनै अउ सतर्बोजनै अउ उ प्रान्त क रहइवाले सबहि अधिकारियन, तू पचन्क आदेस देत हउँ कि तू लोग यरूसलेम स दूर रहा। 7समिकन क परेसान जिन करा। परमेस्सर क उ मन्दिर क काम क बन्द करइ क जतन जिन करा। यहूदा क राज्यपाल अउर यहूदा क बुर्जुगन क एनका फुन स बनावइ द्या। ओनका परमेस्सर क मन्दिर क उहइ जगह पइ फुन स बनावइ द्या जहाँ पहिले रहा।

8अब मई एक आदेस देत हउँ कि तू पचन्क परमेस्सर क मन्दिर क बनावइ वाले यहूदा क बुर्जुगन बरे का करइ चाही: इमारत क लागत क भुगतान राजा क खजाने स होइ चाही। इ धन फरात नदी क पच्छिम क छेत्र क प्रान्तन स कर क रूप मँ इकट्ठा कीन्ह गवा रहा। इ सबइ काम हाली स करा, जेहसे काम रुकइ नाहीं। 9ओन लोगन क उ सब द्या जेकर ओनका जरूरत होइ। जदि ओनका सरग क परमेस्सर क बलि क बरे जवान बर्धन, भेड़न या मेमनन क जरूरत पड़इ तउ ओनका उ सब कछू द्या। जदि यरूसलेम क याजक गोहूँ, नोन, दाखरस अउ तेल माँगइ तउ बिना भूल चूक क हर रोज इ सबइ चिजियन ओनका द्या। 10इन चिजियन क ओनका द्या जेहसे उ पचे सरग क परमेस्सर क खुस करइवाली बलियन भेंट करइँ अउर राजा अउ ओकरे पूतन क कल्यान बरे पराथना करइँ।

11मई इ आदेस भी देत हउँ कि जदि कउनो मनई इ आदेस क बदलत ह तउ उ मनई क मकान स एक तु काठे क कड़ी क निकार लेइ चाही अउ उ काठे क कड़ी क उ मनई क तने पइ घँसाइ देइ चाही अउ ओकरे घरे क तब तलक नस्ट कीन्ह जाइ चाही जब तलक कि उ पाथरन क ढेर न बनि जाइ।

12परमेस्सर यरूसलेम पइ आपन नाउँ अंकित करइ अउर मोका आसा अहइ कि परमेस्सर कउनो भी उ राजा या मनई क पराजित करी जउन इ आदेस क बदलइ क जतन करत ह। जदि कउनो यरूसलेम मँ इ मन्दिर क नस्ट करइ चाहत ह तउ मोका आसा अहइ कि परमेस्सर ओका नस्ट कइ देइ।

मई, दारा, इ आदेस दिहेउँ ह। इ आदेस क पालन हाली अउर पूर्ण रूप स होइ चाही।

मन्दिर क पूर्ण अउर समर्पित होब

13एह बरे फरात नदी क पच्छिम पहुँचा क प्रसासक तत्तनै, सतर्बोजनै अउर ओकरे संग क लोग राजा दारा क आदेस क पालन किहन। ओन लोगन आग्या क पालन हाली अउर पूर्ण रूप स किहन, 14एह बरे यहूदी अग्रजन (प्रमुखन) निर्माण कार्य जारी रखेन अउर उ पचे सफल भाएन काहेकि हग्नै नबी अउ इद्दो क पूत जकर्याह ओनका प्रोत्साहित किहस। ओन लोग मन्दिर क निर्माण कार्य पूरा कइ लिहन। इ इस्त्राएल क परमेस्सर क आदेस पालन करइ क बरे कीन्ह गवा। इ फारस क राजा लोगन, कुस्रू, दारा अउर अर्तछत्र जउन आदेस दिहे रहेन ओनकर

पालन करइ बरे कीन्ह गवा। 15मन्दिर क निर्माण अदर महीने क तीसरे दिन भवा। इ राजा दारा क सासन क छठौँ बरिस मँ भवा।

16तब इस्त्राएल क लोग बहोत उल्लास क संग परमेस्सर क मन्दिर क समर्पण उत्सव मनाएन। याजक, लेवीबंसी अउर बन्धुवाई स वापस आए दूसर सबहि लोग इ उत्सव मँ सामिल भएन।

17उ पचे परमेस्सर क मन्दिर क इ तरह समर्पित किहन: उ पचे एक सौ बर्धन, दुइ सौ भेड़न अउर चार सौ मेमनन भेंट किहन अउर उ पचे पूरे इस्त्राएल क बरे पाप भेंट क रूप मँ बारह बोकसन भेंट किहन अर्थात इस्त्राएल क बारह परिवार समूह मँ स हर एक क बरे एक बोकरा भेंट किहन। 18तब उ पचे यरूसलेम मँ मन्दिर मँ सेवा करइ क बरे याजकन अउ लेवी बंसियन क समूह बनाएन। इ सब उ पचे उहइ प्रकार किहन जउने प्रकार मूसा क किताबे मं बतावा गवा ह।

फसह त्यौहार

19पहिले महीने क चौदहवें दिन ओन यहूदियन फसह क त्यौहार मनाएन जउन बन्धुवाई स वापस लउटे रहेन। 20याजकन अउर लेवीबंसियन अपने क सुद्ध किहन। ओन सबहि फसह क त्यौहार मनावइ क बरे अपने क स्वच्छ अउ तइयार किहन। उ पचे बन्धुवाई स लउटइवाले सबहि यहूदियन क बरे फसह क त्यौहार क मेमने क मारेन। उ पचे इ अपने बरे अउर अपने याजकन बंधुअन क बरे किहन। 21एह बरे बन्धुवाई स लउटे इस्त्राएल क सबहि लोग फसह क त्यौहार क बलि खाएस अउर उ प्रदेस मँ रहइवाले दूसर सबइ लोग जउन अपने आप क ओन असुद्ध चिजियन स अलग हटिके सुद्ध कइ रहेन अउर जउन ओन लोगन मँ सामिल होइ रहेन, ओन लोग भी फसह क त्यौहार क भोजन मँ हीसा लिहन। ओन लोग इ एह बरे किहन ताकि उ पचे भी यहोवा इस्त्राएल क परमेस्सर क उपासना करइ सकइँ। 22उ पचे अखमीरी रोटी क उत्सव सात दिन तलक बहोत जियादा खुसी स मनाएन। यहोवा ओनका बहोत खुस किहस काहेकि उ अस्सूर क राजा क बेउहार क बदल दिहे रहा। अस्सूर क राजा इस्त्राएल क परमेस्सर क मन्दिर क बनावइ मँ ओनकर मदद किहे रहा।

एज़्रा यरूसलेम आवत ह

7 फारस क राजा अर्तछत्र क सासनकाल मँ एन सब बातन क होइ जाइ क पाछे एज़्रा बाबेल स यरूसलेम आवा। एज़्रा सरायाह क पूत रहा। सरायाह अजर्याह क पूत रहा। अजर्याह हिल्किय्याह क पूत रहा। 2हिल्किय्याह सल्लूम क पूत रहा। सल्लूम सादोक क पूत रहा। सादोक अहीतूब क पूत रहा। 3अहीतूब अमर्याह क पूत रहा। अमर्याह अजर्याह क पूत रहा। अजर्याह मरार्थोत क पूत रहा। 4मरार्थोत जरह्याह क पूत रहा। जरह्याह उज्जी क पूत रहा। उज्जी बुक्की क पूत रहा। 5बुक्की अबीसू क पूत रहा।

अबीसू पीनहास क पूत रहा। पीनहास एलीआज़र क पूत रहा। एलीआज़र महायाजक हारून क पूत रहा।

6एज़ा बाबेल स यरूसलेम आवा। एज़ा एक लिपिक रहा। उ मूसा क नेमन क माहिर रहा। मूसा क नेम यहोवा इस्त्राएल क परमेस्सर क जरिये दीन्ह गवा रहा। राजा अर्तछत्र एज़ा क उ हर चीज़ दिहस जेका उ मॉगिस काहेकि यहोवा परमेस्सर एज़ा क संग रहा। 7इस्त्राएल क कछू लोग, अउर कछू याजकन, लेबियन, गायकन, दुआरपालन अउर मन्दिर क सेवकन एज़ा क संग आएन। उ पचे अर्तछत्र क सासनकाल क सतएँ बरिस यरूसलेम आएन। 8एज़ा यरूसलेम में राजा अर्तछत्र क राजकाल क सतएँ बरिस क पाँचवें महीने में आवा। 9एज़ा अउ ओकर समूह बाबेल क पहिले महीने क पहिले दिन यरूसलेम पहुँचा। यहोवा परमेस्सर एज़ा क संग रहा। 10एज़ा आपन पूरा धियान यहोवा क नेमन क अध्ययन अउर ओनका पालन करइ में दिहस। एज़ा इस्त्राएल क लोगन क यहोवा क नेमन अउर आदेसन क सिच्छा देइ चाहत रहा।

राजा अर्तछत्र क एज़ा क पत्र

11एज़ा, एक ठु याजक अउर लिपिक रहा। इस्त्राएल क यहोवा क जरिये दीन्ह गए आदेसन अउर नेमन क बारे में उ काफी गियान रखत रहा। इ उ पत्र क प्रतिलिपि अहइ जेका राजा अर्तछत्र लिपिक एज़ा क दिहे रहा:

12राजा लोगन क राजा अर्तछत्र कइँती स याजक एज़ा क जउन सरग क परमेस्सर क नेमन क पिपिक अहइ:

सुभ-कामनाएँ!

13मई इ आदेस देत हउँ: कउनो मनई जउन इस्त्राएल क अहइ, याजक अउर इस्त्राएल क लेवीवंसी जउन मोरे राज में रहत ह अउर एज़ा क संग यरूसलेम जाइ चाहत ह, तोहार संग जाइ सकत ह। 14एज़ा, मई अउर मोरे सात सलाहकार तू पचन्क पठवत हीं। तू पचन्क यहूदा अउर यरूसलेम क जाइ चाही। इ लखा कि तोहार लोग तोहरे परमेस्सर क नेमन क पालन कइसे करत अहइँ। तोहरे पचन्क लगे नेम अहइ।

15मई अउ मोर सलाहकार इस्त्राएल क परमेस्सर क सोना चाँदी देत अहइँ। परमेस्सर क निवास यरूसलेम में अहइ। तू पचन्क इ सोना चाँदी अपने संग लइ जाइ चाही। 16तू पचन्क बाबेल क सबहिं प्रान्तन स होइके जाइ चाही। लोगन अउर याजकन क स्वच्छा भेंट क संग सबइ सोना अउ चाँदी क बटोरा। इ सबइ भेंटन यरूसलेम में ओनके परमेस्सर क मन्दिर बरे अहइँ।

17इ धने क उपयोग बर्धन, भेड़न अउ मेमनन बेसहइ में करा। ओन बलियन क संग जउन अन्न भेंट अउ पेय भेंट चढ़ाई जाब अहइँ, ओनका बेसहा। तब ओनका यरूसलेम में अपने परमेस्सर क मन्दिर क वेदी पइ बलि चढ़ावा। 18ओकरे पाछे तू अउर दूसर यहूदी बचे भए सोने चाँदी क जइसा भी चाहा, खर्च कइ सकत

ह। एकर उपयोग वइसे ही करा, जउन तोहरे परमेस्सर क खुस करइवाला होइ। 19ओन सबहिं चिजियन क यरूसलेम क परमेस्सर क लगे लइ जा। उ सबइ चिजियन तोहरे परमेस्सर क मन्दिर में उपासना क बरे अहइँ। 20तू कउनो भी दूसर चिजियन लइ सकत ह जेनका तू अपने परमेस्सर क मन्दिर क बरे जरूरी समुझत अहा। राजा क खजाने क धन क उपयोग जउन कछू तू चाहत अहा ओकरे बेसहइ क बरे कइ सकत ह।

21अब मई, राजा अर्तछत्र इ आदेस देत हउँ: मई ओन सबहिं लोगन क जउन फरात नदी क पच्छिमी पहेँटा में राजा क कोसपाल अहइँ, आदेस देत हउँ कि उ पचे एज़ा क जउन कछू भी मॉगइ देइँ। एज़ा सरग क परमेस्सर क नेमन क लिपिक अउर याजक अहइ। इ आदेस क हाली अउ पर्ण रूप स पालन करा। 22एज़ा क एतना तलक दइ द्या: पौने चार टन चाँटी, छ: सौ बुसल गोहूँ, छ: सौ गौलन दाखरस, छ: सौ गौलन जइतून क तेल अउ ओतना नोन जेतना एज़ा चाहइ। 23सरग क परमेस्सर, एज़ा क जउने चीज क पावइ बरे आदेस द्या ओका तू पचन्क हाली अउर पूरी तरह स एज़ा क देइ चाही। सरग क परमेस्सर क मन्दिर क बरे इ सबइ सब चिजियन करा। हम नाहीं चाहित कि परमेस्सर मोरे राज या मोरे पूतन पइ किरोधित होइ।

24मई चाहत हउँ कि तू लोगन क मालूम होइ कि याजकन, लेबियन, गायकन, दुआरपालन अउ परमेस्सर क मन्दिर क दूसर कर्मचारियन अउ सेवकन क कउनो भी तरह क कर देइ क बरे मजबूर करब, नेम क खिलाफत अहइ। 25एज़ा मई तोहका तोहरे परमेस्सर क जरिये प्राप्त बुद्धि क उपयोग अउ सरकारी अउर धार्मिक निआव अधीसन क चुनइ क अधिकार देत हउँ। इ सबइ लोग फरात नदी क पच्छिम में रहइवाले सबहिं लोगन क बरे निआव अधीस होइहीं। उ पचे ओन सबहिं लोगन क निआव करिहीं जउन तोहरे परमेस्सर क नेमन क जानत हीं। जदि कउनो मनई ओन नेमन क नाहीं जानत तउ उ पचे निआव अधीस ओका ओन नेमन क बतइहीं। 26जदि कउनो अइसा मनई जउन तोहरे परमेस्सर क नेमन या राजा क नेमन क पालन नाहीं करत होइ, तउ ओका जरूर दण्डित कीन्ह जाइ चाहीं। अपराध क अनुसार ओका मृत्यु दण्ड, देस निकारी, ओकरी सम्पति क जब्त करब या जेल में डावइ क सजा दीन्ह जाइ चाही।

एज़ा परमेस्सर क स्तुति करत ह

27हमरे पुरखन क परमेस्सर यहोवा क स्तुति करा। उ राजा क मन में इ सबइ विचार डाएस कि उ यरूसलेम में यहोवा क मन्दिर क सम्मान करइ।

28यहोवा क राजा, ओकरे सलाहकारन अउर बड़के अधिकारियन क सामने मोह पइ आपन सच्चा पिरेम परगट किहा। यहोवा मोरे परमेस्सर मोरे संग रहा, एह बरे मई

साहसी रहा अउर मई इस्त्राएल क प्रमुखन क अपने संग यरूसलेम जाइ बरे एकट्ठा किहेउँ।

एज़ा क संग लउटइवाले परिवार प्रमुखन क सूची

8 इ बाबेल स यरूसलेम लउटइवाले परिवार प्रमुखन अउर दूसर लोगन क सूची अहइ जउन मोरे (एज़ा) क संग लउटेन। हम लोग राजा अर्तछत्र क सासनकाल में यरूसलेम लउटेन। इ नाउँन क सूची अहइ: 2पीनहास क संतानन में स गोर्सोम रहा; ईतामार क संतानन में स दानिय्येल रहा; दाऊद क संतानन में स हत्सू रहा, 3सकन्याह क संतानन में स परोस, जकर्याह क संतान अउ डेढ़ सौ दूसर लोग; 4पहल्मोआब क संतानन में स जरह्याह क पूत एल्यहोएनै अउर दूसर दूइ सौ लोग, 5जन्तू क संतानन में स यहजीएल क पूत सकन्याह अउर तीन सौ दूसर लोग; 6आदीन क संतानन में स योनातान क पूत एबेद अउर पचास दूसर लोग, 7एलाम क संतानन में स अतल्याह क पूत यसायोह अउर सतर दूसर लोग, 8सपत्याह क संतानन में स मीकाएल क पूत जबघाह अउर अस्सी दूसर लोग, 9योआब क संतानन में स यहीएल क पूत ओबद्याह अउर दूइ सौ अट्ठारह दूसर मनई, 10बानी, योसियाह क पूत सलोमति क संतानन में स अउर एक सौ साठ दूसर लोग, 11बेबै क संतानन में स बेबै क पूत जकर्याह अउर अट्ठाईस दूसर मनई, 12अजगाद क संतानन में स हक्कातान क पूत योहानान अउर एक सौ दस दूसर लोग; 13अदोनीकाम क अंतिम संतानन में स एलीपेलेत योएल, समायाह अउर साठ दूसर मनई रहेन, 14बिगवै क संतानन में स उतै, जब्बूद अउर सतर दूसर लोग।

यरूसलेम क वापसी

15मई ओन सबहिं लोगन क अहवा कइँती बहइवाली नदी क लगे एक संग एकट्ठा होइ क बोलाएउँ। हम लोग हुवाँ तीन दिन तलक डेरा डाए। मोका इ पता लगा कि उ समूह में याजक रहेन, मुला कउनो लेवीबंसी नाहीं रहा। 16तउ मई एन प्रमुखन क बोलाएउँ: एलीएजेर, अरीएल, समायाह, एलनातान, यारीब, एलनातान, नातान, जकर्याह अउ मसुल्लाम अउ मई योयारीब अउर एलनातान (इ सबइ लोग सिच्छक रहेन) क बोलाएस। 17मई ओन मनइयन क इद्दो क लगे पठएउँ। इद्दो कासियाह नगर क प्रमुख रहा। मई उ मनई क बताएउँ कि उ पचे इद्दो अउर ओकर सम्बंधियन स का कहइँ। ओकर सम्बंधी कासियाह में मन्दिर क सेवक अहइँ। मई ओन लोगन क इद्दो क लगे पठएउँ जेहसे इद्दो परमेस्सर क मन्दिर में सेवा करइ क बरे हमरे लगे सेवकन क पठएस। 18काहेकि परमेस्सर क कृपालु हाथ हमरे ऊपर रहेन। इद्दो क सम्बंधियन एन मनइयन क हम लोगन क लगे पठएस: महली क संतानन में स सेरेब्याह नाउँ क बुद्धिमान मनई। महली लेवी क पूतन में स एक रहा। लेवी इस्त्राएल क पूतन में स एक रहा। उ पचे हमरे लगे सेरेहब्याह अउर ओकरे पूतन क पठएस। इ सबइ सब मिलाइके उ परिवार स इ सबइ अट्ठारहे मनई रहेन। 19उ पचे मरारी क संतानन में स हसब्याह अउर यसायाह क भी

ओनकर बन्धुअन अउर ओनके पूतन क संग पठएस। उ परिवार स कुल मिलाइके बीस मनई रहेन। 20उ पचे मन्दिर क दुइ सौ बीस सेवक भी पठएन। ओनकर पुरखन उ सबइ लोग रहेन जेनका दाऊद अउ बड़के अधिकारियन लेवीबंसियन क मदद बरे चुने रहा। ओन सब क नाउँ सूची में लिखे भाए रहेन।

21हुवाँ अहवा नदी क लगे, मई घोसणा किहेउँ कि हमका उपवास रखइ चाही। हम क अपने क परमेस्सर क समन्वा बिनम्र बनावइ क बरे उपवास रखइ चाही। हम लोग परमेस्सर स अपने बरे, अपने बच्चन क बरे, अउर जउन चिजियन हमार रहिन, ओनके संग सुरच्छित जात्रा क बरे पराथना करइ चाहत रहे। 22राजा अर्तछत्र अपनी जात्रा क समइ अपनी सुरच्छा बरे फउजी अउ घुड़सवारन क माँगइ मई लजान रहेउँ। सइकिया पइ दुस्मन रहेन। मोरी लज्जा क कारण इ रहा कि हम राजा स कहि रखे रहे कि, “हमार परमेस्सर उ हर मनई स संग अहइ जउन ओह पइ बिस्सास करत ह अउर परमेस्सर उ हर मनई पइ किरोधित होत ह जउन ओहसे मुँह फेरि लेत ह।” 23एह बरे हम लोग अपनी जात्रा क बारे में उपवास रखे अउर परमेस्सर स पराथना कीन्ह। उ हम लोगन क पराथना सुनेस।

24तब मई याजकन में स बारह क नियुक्त किहेउँ जउन प्रमुख रहेन। मई सेरेब्याह, हसब्याह अउर ओनके दस भाइयन क चुनेउँ। 25मई चाँदी, सोना अउर दूसर चिजियन क तउलेउँ जउन हमरे परमेस्सर क मन्दिर क बरे दीन्ह गइ रहिन। मई एन चिजियन क ओन बारह याजकन क दिहेउँ जेनका मई नियुक्त किहे रहेउँ। राजा अर्तछत्र, ओकर सलाहकार, ओकर बड़के अधिकारियन अउर बाबेल में रहइवाले सबहिं इस्त्राएलियन परमेस्सर क मन्दिर क बरे ओन चिजियन क दिहन। 26मई एन सबहिं चिजियन क तउलेउँ। हुवाँ चाँदी पच्चीस टन रही। हुवाँ चाँदी क बर्तन व दूसर चिजियन रहिन। जेनकर वजन पौने चार किलोग्राम रहा। हुवाँ सोना पौने चाट टन रहा। 27अउर मई ओनका बीस सोना क खोरन दिहेउँ। खोरन क वजन लगभग साढ़े आठ किलो रहा अउर मई ताँबा क चमकदार दूई ठु बरतन दिहस जउन कि सोना क समान कीमती रहा। 28तब मई ओन बारह याजकन स कहेउँ: “तू अउर इ सबइ चिजियन यहोवा क बरे पवित्र अहइँ। लोग इ चाँदी अउर सोना यहोवा तोहरे पचन्क पुरखन परमेस्सर क दिहन। 29एह बरे एनकर रच्छा होसियारी स करा। तू पचे एकरे बरे तब तलक जिम्मेदार अहा जब तलक तू पचे एका यरूसलेम में मन्दिर क प्रमुखन क नाहीं दइ देत्या। तू पचे एनका प्रमुख लेवीबंसियन क अउर इस्त्राएल क परिवार प्रमुखन क देब्या। उ सबइ ओन चिजियन क तउलिहीं अउर यरूसलेम में यहोवा क मन्दिर क कोठरियन में धरिहीं।”

30तउ ओन याजकन अउ लेवियन उ चाँदी, सोना अउर ओन बिसेस वस्तुअन क ग्रहण किहन जेनका एज़ा तउले रहा अउर ओनका यरूसलेम में परमेस्सर क मन्दिर में इ सबइ चिजियन लइ जाइ क बरे कहा गवा रहा।

31पहिले महीने क बारहवें दिन हम लोग अहवा नदी क छोड़े अउर हम यरूसलेम कइँती चल पड़े। परमेस्सर हम

लोगन क संग रहा अउर उ हमार रच्छा दुस्मनन अउ डाकुअन स पूरे रास्ते भर किहस। 32तब हम यरूसलेम आइ पहुँचे। हम हुवाँ तीन दिन आरम कीन्ह। 33चउथे दिन हम परमेस्सर क मन्दिर क गए अउर चाँदी, सोना अउर बिसेस चिजियन क तउले। हम याजक ऊरीयाह क पूत मरेमोत क उ सबइ चिजियन दिहेन। पीनहास क पूत एलीआजर मरेमोत क संग रहा। अउर लेवीबंसी येसू क पूत योजाबाद अउर बिन्तूर्ई क पूत नोअद्याह भी ओनके संग रहा। 34हम हर एक चीज गिने अउर ओनका तउले। तब हम उ समइ कुल वजन लिखे।

35तब ओन यहूदी लोग जउन बंधुवाई स आए रहेन, इस्राएल क परमेस्सर क होमबलि दिहेन। उ पचे बारह बर्धन पूरे इस्राएल क बरे छियानबे भेड़न, सतहतर मेमनन अउ बारह बोकसन पाप भेंट बरे चढ़ाएन। इ सब यहोवा क बरे होमबलि रही।

36तब ओन लोग राजा अर्तछत्र क पत्र, राजकीय अधिपतियन अउ फरात क पच्छिम क छेत्र क प्रसासकन क दिहेन। तब उ पचे इस्राएल क लोगन अउर मन्दिर क अपना समर्थन दिहेन।

विदेसी लोगन स बियाह क बारे में एज़ा क पराथना

9 जब हम लोग इ सब कइ चुके तब इस्राएल क प्रमुख मोरे लगे आएन। उ पचे कहेन, “एज़ा इस्राएल क लोगन अउ याजकन अउ लेवी बंसियन अपने चाहिहूँ कइँती रहइवाले लोगन स अपने क अलग नार्ही रखेस ह। इस्राएल क लोग कनानियन, हितियन, परिजियन, यबूसियन, अम्मोनियन, मोआबियन, मिस्त्र क लोगन अउ एमोरियन क जरिये कीन्ह जाइवालो बहोत स बुरी बातन स प्रभावित भए हैं। 2इस्राएल क लोग एन लोगन क बिटियन स बियाह किहेन ह। जउन कि इस्राएली नार्ही रहेन इस्राएल क लोग पवित्तर पीढ़ी* अहइ। मुला अब उ पचे अपने चारिहूँ ओर रहइवाले दूसर लोगन स मिलिके दोगले अउर असुद्ध होइ गएन ह। इस्राएल क लोगन क नेतन अउर बड़के अधिकारियन इ अपराध क करइ में पहिले रहेन ह।” 3जब मई इ बारे में सुनेउँ, मई अपना लबादा अउ अंगरखा इ देखावइ बरे फार डाएउँ कि मई बहोत परेसान हउँ। मई अपने मूँड़ अउर दाढ़ी क बार नौच डाएउँ। मई दुःखी अउ अस्त - व्यस्त बइठ गएउँ। 4तब हर एक मनई जउन इस्राएल क परमेस्सर क नेमन क आदर करत रहा, भय स काँप उठा। उ पचे डर गएन काहेकि जउन इस्राएल क लोग बन्धुवाई स लउटेन, उ पचे परमेस्सर क भक्त नार्ही रहेन। मोका धक्क लगा अउर मई घबराइ गएउँ। मई हुवाँ साँझ क बलि भेंट क समइ तलक बइठा रहेउँ अउर उ पचे लोग मोरे चारिहूँ कइँती एकट्ठा रहेन।

5तब, जब साँझ क बलि भेंट क समइ भवा, मई आपन दुःख क अवस्था में ही उठेउँ। मई बहोत लजान रहेउँ। मोर लबादा अउ अंगरखा दुइनउँ फटे रहेन अउर मई घुटरुअन

क बल बइठिके यहोवा अपने परमेस्सर कइँती हाथ फइलाएउँ। 6तब मई पराथना किहेउँ:

हे मोरे परमेस्सर, मई एतना लजान अउर संकोच में हँउ कि तोहरी कइँती मोर आँखिन नार्ही उठतिन, हे मोर परमेस्सर! मई लजान हउँ काहेकि हमरे पाप हमरे मूँड़ स ऊपर चले गए हैं। हमरे अपराधन क ढेरी एतनी होइ गइ ह कि उ अकासे तलक पहुँच चुकी ह। 7हमरे पुरखन क समइ स अब तलक हम लोग बहोत जियादा पाप किहा ह। हम लोग पाप किहा, एह बरे हम, हमरे राजा अउर हमरे याजक दण्डित भएन। हम लोग बिदेसी राजा लोगन क जरिये तरवार स अउर बन्दीखाने में धौंधे जाइ तलक दण्डित भएन ह। उ पचे राजा हमार धन लइ गएन अउर हमका लजित किहेन। इ स्थिति आजु भी वइसी अहइ।

8आखीर में अब तू हम पइ कृपालु भवा ह। तू हमरे बचा भवा लोगन क बन्धुआई स निकरि आवइ दिहा ह अउर आपन पवित्र जगह में पनाह दिहा ह। यहोवा, तू हम क नवा जीवन दिहा ह अउर हमरी गुलामी स अजाद किहा ह। 9हँ, हम दास रहे, मुला तू हम क सदा ही क बरे दास नार्ही रहइ देइ चाहत रहा। तू हम पइ कृपालु रहा। तू फारस क राजा लोगन क हम पइ कृपालु बनाया। तोहार मन्दिर नेस्त नाबूद होइ गवा रहा। मुला तू हम क नवी जिन्नगी दिहा जेहसे हम तोहरे मन्दिर क फुन बनाइ सकित ह अउर नवे क तरह पक्का कइ सकत हीं। ह परमेस्सर तू हम पचन्क यहूदिया अउर यरूसलेम में बेरा* बनाइ दिहस।

10हमरे परमेस्सर, अब हम तोहसे का कहि सकित ह? हम लोग तोहरी आग्या क पालन करब फुन तजि दीन्ह ह। 11हमरे परमेस्सर, तू अपने सेवकन अर्थात नबियन क उपयोग किहा अउर ओन आदेसन क हम क दिहा। तू कहे रहया: “जउने देस में तू रहइ जात अहा अउर जेका आपन बनावइ जात रहया ह, उ देस भ्रस्ट अहइ। इ ओन बहोत बुरे कामन स भ्रस्ट भवा ह जेनका हुवाँ रहइवालन किहेन ह। ओन लोग इ देस में हर जगह पइ बहोत जियादा बुरे काम किहेन ह। उ पचे इ देस क अपने पापन स गंदा कइ दिहेन ह। 12एह बरे इस्राएल क लोगो, अपने बच्चन क ओनके बच्चन स बियाह जिन करइ द्या। ओनके संग सम्बंध न रखा। अउर ओनकर चिजियन क लालसा न करा। मोरे आदेसन क पालन करा जेहसे तू सक्तीसाली होब्या अउर इ देस क अच्छी चिजियन क भोग करब्या। तब तू इ देस क बनाए रखब्या अउर अपने बच्चन क देब्या।”

13जउन बुरी घटनन हमरे संग घटिन उ सबइ हमार अपनी अपनी गलतियन स घटिन। हम लोग पाप क करम किहे अही अउर हम लोग बहोत अपराधी अही। मुला हमार परमेस्सर, तू हम क ओहसे बहोत, कम दण्ड दिहा ह जेतना हम मिलइ चाही। हम लोग बड़े भयानक करम किहे अही अउर हम लोगन क एहसे जियादा दण्ड मिलइ चाही। अइसा होत भए भी तू हमरे लोगन में स कछू क बन्धुवाई स अजाद होइ जाइ दिहा ह। 14एह बरे हम जानित ह कि हम क तोहरे आदेसन क तोड़इ नार्ही चाही। हम क ओन लोगन

पवित्तर पीढ़ी काहेकि मूसा क व्यस्था अंतरजातीय बियाह क रोकत ह, एज़ा अउर नेतन चिन्ति अहइ कि इ यहूदी साइद गैर यहूदी स मिल जाइ अउर आपन यहूदीपन खो देइ।

बेरा बेरा सब्द क उपयोग यहूदियन क यरूसलेम इस्राएल वापिस ओन क मालिकाना अधिकार क दसाइ बरे कीन्ह गवा ह।

क संग बियाह नाही करइ चाही। उ सबइ लोग बहोत बुरे काम करत हीं। परमेस्सर जदि हम लोग ओन बुरे लोगन क संग बियाह करत रही तउ हम जानित ह कि तू हम क नस्ट कइ देब्या। तब इस्राएल क लोगन में स कउनो भी जिअत नाही बचि पाइ।

15यहोवा, इस्राएल क परमेस्सर, तू अच्छा अहइ। अउर तू अब भी हम में स कछू क जिअत रहइ देब्या। हाँ, हम अपराधी अहइ। अउर अपने अपराध क कारण हम में कउनो क भी तोहरे समन्वा खड़े होइ नाही दीन्ह जाइ चाही।

लोग आपन पाप स्वीकार करत हीं

10 एज्रा पराथना करत रहा अउर पापन क स्वीकार करत रहा। उ परमेस्सर क मन्दिर क समन्वा रोवर रहा अउर निहुरिके प्रणाम करत रहा। जउने समइ एज्रा इ कहत रहा उ समइ इस्राएल क लोगन क एक बड़ा समूह मेहरारू मनसेधू अउर बच्चन ओकरे चारिहूँ कइँती बटुर गएन। उ सबइ लोग भी जोर-जोर स रोवत रहेन। 2तब यहीएल क पूत सकन्याह जउन एलाम क सन्तानन में स रहा, एज्रा स बातन किहस। सकन्याह कहेस, “हम लोग अपने परमेस्सर क भक्त नाही रहे। हम लोग इ भुइँया क लोग क बिदेसी मेहररूअन क संग बियाह किहा ह। मुला जदपि हम इ कइ चुके अहइ तउ भी इस्राएल क बरे आसा अहइ। 3अब हम अपने परमेस्सर क समन्वा ओन सबहिं मेहररूअन अउर ओनके बच्चन क वापस पठवइ क वाचा करी। हम लोग इ एज्रा क सलाह मानइ बरे अउ ओन लोगन क सलाह मानइ क बरे करब जउन परमेस्सर क नेमन क सम्मान करत हीं। हम परमेस्सर क नेमन क पालन करब। 4एज्रा खड़े हवा, इ तोहार उत्तरदायित्व अहइ, किन्तु हम तोहार समर्थन करब। एह बरे साहसी बना अउर एका करा।”

5एह बरे एज्रा उठ खड़ा भवा। उ प्रमुख याजक, लेवीबंसियन अउर इस्राएल क सबहिं लोगन स जउन कछू उ कहेस, ओका करइ क प्रतिग्या कराएस। 6तब एज्रा परमेस्सर क भवन क समन्वा स दूर हट गवा। जब तलक एज्रा हुवाँ रहा उ भोजन नाही किहस अउर न ही पानी पियस। उ इ किहस काहेकि उ तब भी बहोत दुःखी भवा। उ इस्राएल क ओन लोगन बरे दुःखी रहा जउन यरूसलेम क वापस आए रहेन। 7उ पचे यहूदा अउ यरूसलेम में हर एक जगहिया में इ एलान किहस कि सबइ यहूदी लोग जउन कि बन्धुवाई स वापस लउटे यरूसलेम में एक संग एकट्ठा होइ। 8कउनो भी मनई जउन तीन दिन क भीतर यरूसलेमा नाही आई, तउ ओकर सम्पत्ति उ भुइँया में जबत कइ लीन्ह जाई। बड़के अधिकारियन अउर नेतन (प्रमुखन) इ निर्णय लिहन अउर उ मनई ओन लोगन क समूह क निअंवर नाही रहि जाई जउन कि बन्धुवाई स वापस लउटी क आएन।

9एह बरे तीन दिन क भीतर यहूदा अउ बिन्यामीन के परिवार क सबहिं मनई यरूसलेम में एकट्ठा भएन अउर नवें महीने क बीसवें दिन सबहिं लोग मन्दिर क आँगन में

आइ गएन। उ पचे इ बिसय क डर स अउर भारी बर्खा क कारण काँपत रहेन। 10तब याजक एज्रा खड़ा भवा अउर उ ओन लोगन स कहेस, “तू लोग परमेस्सर क बरे बिस्सासी नाही रहेन। तू पचे बिदेसी मेहररूअन क संग बियाह किहा ह। तू पचे वइसा कइके इस्राएल क अउर जियादा अपराधी बनाया ह। 11अब तू लोगन क यहोवा क समन्वा स्वीकार करब होइ कि तू पचे पाप किहा ह। यहोवा तू लोगन क पुरखन क परमेस्सर अहइ। तू पचनक यहोवा क आदेस क पालन करइ चाही। अपने चारिहूँ ओर रहइवाले लोगन अउ अपनी बिदेसी मेहररूअन स अपने अलग करा।”

12तब पूरा समूह जउन एक संग एकट्ठा रहा, एज्रा क जवाब दिहस। उ पचे ऊँची आवाज में कहेन: “एज्रा तू बिल्कुल ठीक कहत ह। हम क उ करइ चाही जउन तू कहत ह। 13मूला हुवाँ बहोत स लोग अहई अउर इ बर्खा क समइ अहइ तउ हम लोग बाहरे खड़े नाही रहि सकित। इ समस्या एक या दुइ दिन में हल नाही होइ काहेकि हम लोग बुरी तरह पाप किहे अही। 14पूरे समूह क सभा कइँती स हमरे प्रमुखन क निर्णय करइ द्या। तब निहचित समइ पइ हमरे नगरन क हर एक मनई जउन कउनो बिदेसी मेहरारू स बियाह किहस ह, यरूसलेम आएन। ओनका अपने अग्रजन (प्रमुखन) अउर नगरन क निआव अधीसन क संग हिआँ आवइ दीन्ह जाइ। तब हमार परमेस्सर हम पइ किरोधित होब तजि देइ।”

15सिरिफ थोड़े स मनई इ योजना क बिरुद्ध रहेन। इ सबइ मनई रहेन असाहेल क पूत योनातान अउ तिकवा क पूत यहजयाह रहेन। लेवीबंसी मसुल्लाम अउ सब्बतै भी इ योजना क बिरुद्ध रहेन।

16एह बरे इस्राएल क उ सबइ लोग, जउन यरूसलेम में वापस आए रहेन, उ योजना क स्वीकार करइ क सहमत होइ गएन। याजक एज्रा परिवार क प्रमुख मनईयन क चुनेस। उ हर एक परिवार स एक मनई क चुनेस। हर एक मनई नाउँ लइके चुना गवा। दसवें महीने क पहिले दिन जउन लोगन चुने गए रहेन हर एक मामले क जाँच क बरे बइठेन। 17पहिले महीने क पहिले दिन तलक उ पचे ओन सबहिं मनइयन पइ बिचार करब पूरा कइ लिहन जउन बिदेसी मेहररूअन स बियाह किहे रहेन।

बिदेसी मेहररूअन स बियाह करइवाला क सूची

18याजकन क सन्तानन में इ सबइ नाउँ अहई जउन बिदेसी मेहररूअन स बियाह किहन: योसादाक क पूत येसू क सन्तानन, अउर येसू क भाइयन में स इ सबइ मनई: मासेयाह, एलीआज़र, यारीब अउर गदल्याह। 19एन सबहिं अपनी-अपनी मेहररूअन स सम्बंध तोरब स्वीकार किहन अउर अपने-अपने अपराध क स्वीकार करत भए हर एक अपने रेवइ स एक-एक भेड़ा अपराध भेंट क रूप में चढ़ाएस। उ पचे अइसे अपने-अपने अपराधन क कारण किहन।

20इम्मेर क सन्तानन में स इ सबइ मनई रहेन: हनानी, अउर जबधाह।

21हारीम क सन्तानन में स इ सबइ मनई रहेन: मासेयाह, एलीयाह, समायाह, यहीएल अउर उज्जियाह।

22पसहूर क सन्तानन में स इ सबइ मनई रहेन: एल्योएनै, मासेयाह, इसमाएल, नतनेल, योजाबाद अउर एलासा।

23लेवीबंसियन में स एन मनइयन बिदेसी मेहररूअन स बियाह किहस: योजाबाद, सिमी, केलायाह (एका कलीता भी कहा जात)। ह पतद्दाह, यहूदा अउर एलीआज़र।

24गायकन में सिरिफ इ मनई अहइ, जउन बिदेसी मेहरारू स बियाह किहस:

एल्यासीब, दुआरपालन में स इ सबइ लोग अहई जउन बिदेसी मेहररूअन स बियाह किहस: सल्लूम, तेलेम अउर ऊरी। 25इस्त्राएल क लोगन में स इ सबइ लोग अहई जउन बिदेसी मेहररूअन स बियाह किहन:

परोस क सन्तानन स इ सबइ मनई: रम्याह, यिज्जियाह, मल्कियाह, मियामीन, एलीआज़र, मल्कियाह अउर बनायाह।

26एलाम क सन्तानन में स इ सबइ मनई: मत्तन्याह, जकर्याह, यहीएल, अब्दी, यरेमोत अउर एलीयाह।

27जत्तू क सन्तानन में स इ सबइ मनई एल्योएनै, एल्यासीब, मत्तन्याह, यरेमोत, जाबाद अउर अजीज़ा।

28बेबै क सन्तानन में स इ सबइ मनई: यहोहानान, हनन्याह, जब्बै, अउर अतलै।

29बानी क सन्तानन में स इ सबइ मनई: मसुल्लाम, मल्लूक, अदायाह, यासूब, साल अउर यरामोत।

30पहतमोआब क सन्तानन में स इ सबइ मनई: अदना, कलाल, बनायाह, मासेयाह, मत्तन्याह, बसलेल, बिन्नूई अउर मनस्से।

31हारीम क सन्तानन में स इ सबइ मनई: एलीआज़र, यिस्सियाह, मल्कियाह, समायाह, सिमोन, 32बिन्यामीन, मल्लूक अउर समर्याह।

33हासूम क सन्तानन में स इ सबइ मनई: मत्तनै, मत्तता, जाबाद, एलीपेलेत, यरेमै, मनस्से अउर सिमी।

34बानी क सन्तानन में स इ सबइ मनई: मादै, अग्राम, ऊएल, 35बनायाह, बेदयाह, कलूही, 36बन्याह, मरेमोत, एल्यासीब, 37मत्तन्याह, गत्तनै, यासू,

38बिन्नूई क सन्तानन में स इ सबइ मनई: सिमी, 39सेलेम्याह, नातान, अदायाह, 40मक्नदबै, सासै, सारै, 41अजरेल, सेलेम्याह, सेमर्याह, 42सल्लूम, अमर्याह, अउर योसेफ।

43नबो क सन्तानन में स इ सबइ मनई: यीएल, मत्तित्याह, जाबाद, जबीना, यद्दो, योएल अउर बनायाह।

44एन सबहिं लोग बिदेसी मेहररूअन स बियाह किहे रहेन अउर एनमाँ स कछू क एन मेहररूअन में स बच्चे भी रहेन।